

**Kinguaassiuutitigut atornerlunneqarsimasunut katsorsaavimmik pilersitsinissaq
siunertaralugu Naalakkersuisut Inatsisartunit peqquneqarnissaannik
aalajangiiffigisassatut siunnersuut**

(Inatsisartunut ilaasortamit Juliane Henningsen, Inuit Ataqtigiinnit saqqummiunneqartoq)

aamma

**Kinguaassiuutitigut atornerlunneqarsimasunut katsorsaavimmik pilersitsinissamut
Naalakkersuisut suliaqaqqullugit Inatsisartut aalajangiiffigisassaattut siunnersuut**

Inatsisartunut ilaasortamit Aleqa Hammond, Siumumit saqqummiunneqartoq)

pillugit

Ilaqtariinnermut Ataatsimiititaliap

ISUMALIUTISSIISSUTAA

Aalajangiiffigisassatut siunnersuutip aappassaaneerneqarnerani saqqummiunneqartoq

Ilaqtariinnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqtigiit

Inatsisartunut ilaasortaq Jane Petersen, Inuit Ataqtigiit

Inatsisartunut ilaasortaq Astrid Fleischer Rex, Demokraatit

Inatsisartunut ilaasortaq Ruth Heilmann, Siumut

Inatsisartunut ilaasortaq Naja Petersen, Atassut, sinniisussaq

Ulloq 22. oktober 2009-mi Inatsisartuni siullermeerinerup kingorna aalajangiiffigisassatut siunnersuut Ilaqtariinnermut Ataatsimiititaliap misissorpaa.

Siunnersuutip siunertaa imarisaalu.

Naak siunnersuutigineqartut oqaasertamikkut assigiiaanngikkaluartut naalakkersuinikkut assigiimmik siunertaqartut ilaatigullu assigiissuseqartut Ilaqutariinnermut Ataatsimiititaliaq isumaqarpoq.

Inunnut kinguaassiuutimikkut innarlerneqarsimasunut atonerlunneqarsimasunullu katsorsaavimmik pilersitsinissap taperserneqarnissaa siunnersuutit taakku marluk aqutigalugit kissaatigineqarpoq.

Ilaqutariinnermut Ataatsimiititaliamit oqaaseqaatit.

Siunnersuutit siullermeerinerup kingorna paasinarsivoq siunnersuutit akuerineqarnissaannut partiit Naalakkersuisullu akornanni tapersersuisoqartoq.

Inunnut kinguaassiuutimikkut innarlerneqarsimasunut atonerlunneqarsimasunullu tapersersuinissaq siunertaralugu annertusisamik ataqatigiissakkamillu suliniummik aallartitsisoqarnissaa ataatsimut isigalugu siunnersuutininik oqaluuserinninnermut atatillugu Inatsisartunit taperserneqarmat Ilaqutariinnermut Ataatsimiititaliamit nuannaarutigineqarpoq. Matumani apeqqutaatinnagu pineqartut meeraappata, inuusuttuuppata utoqqaappataluunniit. Kinguaassiuutitigut kanngutsaatsuliorfigineqarsimasut atonerlunneqarsimasullu tamarmik katsorsarneqarnissamik tapersersorneqarnissamillu neqeroorfigineqarsinnaasariaqarput. Suliassaq kommunit suleqatigalugit ingerlateqqinneqartariaqassaaq taakkumi inunnut kinguaassiuutimikkut kanngutsaatsuliorfigineqarsimasunut assigiinngiiaartumik tapersersuinissamik neqerooruteqarput. Inunnut kinguaassiuutimikkut innarlerneqarsimasunut atonerlunneqarsimasunullu atatillugu suliaqarnerminni kommunit misilittagaat pigineqartut pitsaasut atorluarneqarnissaat ersarissarneqarnissaallu pingaaruteqartoq ataatsimiititaliaq isumaqarpoq.

Katsorsaavimmik, siunnersuummi matumani pineqartumik pilersitsinissap saniatigut suliamik immikkut ilisimasallit kaammattuutigaat Islandimi iluseritinneqartoq aallaavigalugu *meeqqanut sullissivimmik* ataatsimik arlalinnilluunniit pilersitsisoqassasoq. Tamatuminnga kaammattuutinillu allanik, taamaalillunilu *meeqqanut sullissivinnut* atatillugu Islandimi iluserititaq Kalaallit nunaanni qanoq ililluni atorneqarsinnaanersoq pillugu misissuinerit sulissutigeqqinnissaat Ilaqutariinnermut Ataatsimiititaliamit qilanaarineqarput.

Meeqqanut inuusuttunullu tunngasunik aammalu suliniuteqarfinnik aalajangersimasunik pingaarnersiulluni ataqatigiissaakkamik periusissamik aallartitsinissamut AIS 2010-mi siunnersuummi kontomi pingaarnermi 20.11.70-imi immikkut sillimmatit 25 mio. kr.-inik immikkoortitsisoqarsimasoq suliamut naalackersuinikkut immikkut soqutigisaqarnerminik siunnersuutillu matumani pineqartup suliarineqarneranut atatillugu Ilaqutariinnermut Ataatsimiititaliap maluginiarpaa.

Meeqqat ilaqutariillu ingerlalluarnissaat pillugu kaammattuutigineqartut tunngavigalugit AIS AIS 2010-p suliarineqarneranut atatillugu 25 mio. kr.-t pingaarnertut atugassanngortinneqarnissaat Isumaginninnermut Naalackersuisup maanna siunnersuutigaa.

2010-mi ukiunilu missingersuusiorfiusuni 25 mio.-kr.-iusunit 6 mio.-t konto pingaarnermut immikkut ittumut immikkoortinneqassasut AIS 2010-p aappassaaneerineqarnissaanut allannguutissatut siunnersuutaavoq, taakku inunnut kinguaassiuutimikkut atonerlunneqarsimasunut suliniutinut, tassunga ilanngullugu immikkoortortamik inuit kinguaassiuutimikkut atornelunneqarsimasut katsorsarneqarfigisinnaasaannik pilersitsinermut atorneqassallutik. Aammattaaq ingerlatat allat, assersuutigalugu sulisunik pikkorissartitsisarnerit, ilisimasamik katersuinerit il.il. siunissami immikkoortortamut atatinneqalissasut opqaatigineqarpoq. Immikkoortortamut tassunga ilaatinneqarsinnaapput nunaqarfinni isorliunerusunilu kinguaassiuutitigut atonerlunneqarsimasunut katsorsaasartutut angalasartut. Aamma kingunerluutinut katsorsaanssamut suliniutinut tapiissuteqartoqarsinnaassaaq. Aammattaaq inersimasunut kinguaassiuutitigut atonerlunneqarsimasunut katsorsaanssamut neqeroortutit aallartisarneqarsinnaapput. Suliniutini tamani aammalu kinguaassiuutitigut kanngutsaatsuliorfigineqarsimasunik kanngutsaatsuliorfigineqarsimanermilluunniit pasitsaassimaneqartunik katsorsaanerni aallartinneqarsimasuni iliuuseqarnissamut pilersaarutip peqqissaarusasup tamakkiisuusullu malinneqarnissaa pingaaruteqartorujussuusoq Ilaqutariinnermut Ataatsimiititaliaq isumaqarpoq.

Siunertamut ukiumoortumik 6 mio. kr.-t naammannersut Naalackersuisunit piaartumik misissorneqassaaq. Aningaasaliissut siunissami pisariaqartitanut sanilliullugit iluarsineqartarnissaat eqqumaffigineqassaaq tamatumani taakku aningaasaliissutissatut siunnersuutigineqartunit amerlanerunerat ikinneruneralluunniit apeqqutaatinnagu.

Taamaalilluni kinguaassiuutitigut atornerluisarnerup kingunerisartagai pinaveersimatinniarlugit ikiorsiiviginiarlugillu siunertalimmik suliniut aallartinneqartoq Ilaqutariinnermut Ataatsimiititaliaq isumaqarpoq.

Suliniutit aallartinneqareersut inuit inunnik allanik kinguaassiuutitigut kangutsaatsuliorfiginnissimasut eqqarsaatigalugit suliniutinik aalajangersimasunik tapertalerneqassasut Ilaqutariinnermut Ataatsimiititaliap kaammattuutigaa. Kinguaassiuutitigut atornerluisarneq pinaveersimatinniarlugu suliniutit sutigut tamatigut aalajangiusimaneqarnissaat nukittorsarneqarnissaallu pingaaruteqartoq Ilaqutariinnermut Ataatsimiititaliaq isumaqarpoq. Tassunga atatillugu ikorfartoqatigiinni aammalu kinguaassiuutitigut atornerluineq akiorniarlugu peqatigiiffinni suliniutit aallartinneqareersut ingerlalluartaqullu tapersorsorneqarnissaat pingaaruteqarpoq.

Inunnut kinguaassiuutitigut innalernerqarsimasunut atornerlunneqarsimasunullu katsorsaavimmik pilersitsinissamat pilersaarutit matumani ilanngullugu meeqqanut sullissivimmik ataatsimik amerlanerusunilluunniit pilersitsinissamat pilersaarutit qanoq ingerlanersut pillugit Naalakkersuisut kingusinnerpaamik ulloq 1. juni 2010-mi Ilaqutariinnermut Ataatsimiititaliamut ilisimatitsissuteqassasut Ilaqutariinnermut Ataatsimiititaliap kaammattuutigissavaa.

Aammattaaq manna iluatsillugu kontomi pingaarnermi 30.10.45-imi aningaasaliissutissatut immikkoortinneqartut pisariaqartitsinnermut naapertuunnersut naliliissummik tunngavilersukkamik tigusaqarnissani Ilaqutariinnermut Ataatsimiititaliap qinnutigaa.

Siunnersuutit piviusunngortinnissaanni aammalu meeqqat ilaqutariillu ingerlalluarnissaat pillugu kaammattuuterpassuit qanittukkut saqqummiunneqartut, tassunga ilanngullugit meeqqanut sullissivimmik ataatsimik arlalinnilluunniit pilersitsinissamik kaammattuutinik sukumiinerusumik naliliinermi eqeersimaartumik anguniagaqarfiulluartaqumillu peqataanissani Ilaqutariinnermut Ataatsimiititaliap kissaatigaa.

Inassuteqaat

Siuliani allassimasutut paasinnilluni siunnersuutit maanna iluserisamittut iluseqartillugit akuersineqassasut ataatsimiititaliamit isumaqatigittumit inassutigineqarpoq.

Taama oqaaseqarluni Ilaqutariinnermut Ataatsimiititaliap siunnersuutit
aappassaaniigassanngortippai.

Debora Kleist
Siulittaasoq

Jane Petersen

Astrid Fleischer Rex

Ruth Heilmann

Naja Petersen
Knud Kristiansen sinnerlugu